

台灣史料汇编



中国文献珍本丛书

台湾史料汇编（七）

全国图书馆文献缩微复制中心

續脩臺灣府志卷二十

欽命巡視臺灣朝議大夫戶科給事中紀錄三次六十七

同脩

欽命巡視臺灣朝議大夫雲南道監察御史加一級紀錄三次范 咸

分巡臺灣道兼提督學政覺羅四明

續脩

臺灣府知府余文儀

藝文一 奏疏

司馬子長游歷天下名山大川而作史記奇逸之氣
流溢行間其所觀者大也山水至臺觀止矣當其一
葦南來煙波萬狀三十六島隱躍舟前九十九峰叅
差目下殆邈焉不知身之在於何境也及其盪我心
胸發言爲論雲興霞蔚波湧濤翻固其宜矣若夫對

景以抒懷因物以寓志雖技類雕蟲而言關治體烏
可盡闕以令島洋減色哉志藝文

奏疏

陳海上情形疏

靖海侯施琅晉江人

鄭成功倡亂二十餘年恃海島爲險蔓延鷓鴣張荼毒生靈
故當時不得不從權折地絕其進取之路嗣而

皇上廣開德意招徠撫綏漸散其黨成功疑懼乃遁踞臺
灣以爲窟康熙元年間兵部郎中黨古里至閩臣備將
逆島可取之勢面乞代奏復上疏密陳荷蒙

俞旨仰藉天威數島可一鼓而平逆孽鄭經逃竄負嵎時
固去歲

朝廷遣官前往招撫未見實意歸誠從來順撫逆勦大關
國體豈容頑抗而止伏思天下一統胡爲一鄭經殘孽盤
踞絕島而折五省邊海地方畫爲界外以避其患況東南
膏腴田園及所產魚鹽最爲財賦之藪可資中國之潤不
可以西北長城塞外風土爲比倘不討平臺灣匪特賦稅
缺減民困日蹙卽防邊若永爲定制錢糧動費加倍輸外
省有限之餉年年協濟兵食何所底止又使邊防持久萬
一有懼罪弁兵及冒死窮民以爲逃逋之窟遺害叵測似
非長久之計且鄭成功之子有十遲之數年並皆長成假
有一二機覺才能收拾黨類結連外島聯絡土番羽翼復
張終爲後患我邊海各省水師雖布設周密以臣觀之亦

僅能自守若使之出海征勦擇其精銳習熟將卒實亦無幾況後此精銳者老習熟者疎何可長恃臣蒙

皇上逾格擢用荷恩深重分應滅賊以盡厥職每細詢各投誠之人及陣獲一二賊夥備悉賊中情形審度可破之勢故敢具疏密將臺灣勦撫機宜爲我

皇上陳之查自故明時原住澎湖百姓有五六千人原住臺灣者有一三萬俱係耕漁爲生至順治十八年鄭成功挈去水陸僞官兵并眷口共計三萬有奇爲伍操戈者不滿二萬又康熙三年間鄭經復挈去僞官兵并眷口約有六七千爲伍操戈者不過四千此數年彼處不服水土病故及傷亡者五六千歷年渡海窺伺被我水師擒殺亦有

數千相繼投誠者計有數百今雖稱三十餘鎮並係新拔
俱非夙練之才或轄五六百兵或轄二三百兵不等計賊
兵不滿二萬之衆船隻大小不及二百號散在南北二路
墾耕而食上下相去千有餘里鄭經承父餘業智勇不足
戰爭匪長其各僞鎮亦皆碌碌之流又且不相聯屬賊衆
耕鑿自給失於操練終屬參差不齊而中無家口者十有
五六豈甘作一世鰥獨寧無故土之思但賊多係閩地之
人其間縱使有心投誠者旣無陸路可通又乏舟楫可渡
故不得不相依爲命鄭經得馭數萬之衆非有威德制服
實賴汪洋大海爲之禁錮如專一意差官往招則操縱之
權在乎鄭經一人恐無率衆歸誠之日若用大師壓境則

去就之機在乎賊衆鄭經安能自主是爲因勦寓撫之法
大師進勦先取澎湖以扼其吭則形勢可見聲息可通其
利在我仍先遣幹員往宣

朝廷德意若鄭經勢窮向化可收全績倘頑梗不悔俟風
信調順卽率舟師聯鯨直抵臺灣拋泊港口以牽制之發
輕快船隻一往南路打鼓港口一往北路鼓港海翁窟港
口或用招誘或圖襲取使其首尾不得相顧自相疑惑疑
則其中有變賊若分則力薄合則勢蹙於以用正用奇相
機調度登岍次第攻擊臣知已知彼料敵頗審率節制之
師賈勇用命可取萬全之勝倘賊踞城固守則先清勦其
村落黨羽撫輯其各社土番狹隘孤城僅容二千餘衆用

得勝之兵而攻無援之城使不卽破將有垓下之變賊可計日而平矣夫興師所慮募兵措餉今沿邊防守經制及駐劄投誠閒曠官兵皆爲臺灣而設聽臣會同督提諸臣挑選習熟精銳用充征旅無事徵募動費之煩此等兵餉征亦用守亦用與其束手坐食於本汛孰若簡練東征於行間至脩整船隻就於應給大脩銀兩領收可無額外動支船未足用則浙粵二省水師亦爲防海設立均可選用仍行該省督提選配官兵各舉總兵一員領駕協勦每船用慣熟澎湖臺灣港路舵梢數人卽於福建投誠官兵內挑選分配不足則將投誠兵汰其老弱別募熟於海道之人補額因此見在額給糧餉不須分外加增無煩夫役輓

輪安配定妥以候風期毋論時日風信可渡立即長驅利便之舉誠莫過於此者但水路行兵出海水深利用大船進港水淺利用小哨今當新造小快哨一百隻以爲載兵進港及差撥哨探之用又當新造小八槳二百隻每大船各配一隻到臺灣臨敵登岸之時可以盤載官兵蜂擁而上其小快哨每隻新造只用價銀四十兩小八槳每隻新造只用價銀一十五兩二項共該用銀七千兩爲費不多若臺灣一平則邊疆寧靖防兵可減百姓得享昇平國家獲增餉稅沿邊文武將吏得安心供職可無意外罪累一時之勞萬世之逸也

密陳航海進勦機宜疏

施琅

臣等

皇上特恩起用以臣深知水性賊情專畀進剿海逆之責受事以來練兵整船靡敢刻懈然用兵之法不得不熟審詳慎古者行兵多用奇計聲東擊西兵不厭詐非可直道而行去冬具疏請以今年三四月微北風進兵蓋爲鄭逆奸細頗多使賊知我舟師必用北風而進然後出其不意而收之臣在在密用間諜亂其黨羽自相猜忌自去年逆艘糾集澎湖欲抗我師據險以逸待勞設我舟師到彼必由澎湖西與頭然後轉帆向東北而進正值春夏之交東北風爲多我船盡是頂風頂流斷難逆進賊已先站立外塹內塹接連娘媽宮俱居我上風上流其勢難以衝擊取

勝故不可不慮及此也所以前議微北風之候猶恐未能
萬全且水道行兵專賴風信潮水非比陸路任意馳驅可
以計定進止臣日夜撫心熟籌莫如就夏至南風成信連
旬盛發從銅山開駕順風平浪船得聯鯨齊行兵無暈眩
之患逆賊縱有狡謀斯時反居下風下流賊進不得戰退
不能守澎湖一得更知賊勢虛實直取臺灣便可克奏膚
功倘逆孽退守臺灣死據要口我師暫屯澎湖扼其吭拊
其背逼近巢穴使其不戰自潰內謀自應不然俟至十月
乘小陽春時候大舉進勦立見蕩平此乃料敵制勝所當
詳細一一披陳者也然臣切有請者督臣姚啟聖調兵
器獎勵士卒精敏整暇咄嗟立辦捐造船隻無所不

志滅賊國爾忘身堅圖報稱非臣所能力止惟是生長北方雖有經緯全才汪洋巨浪之中恐非所長矧撫臣吳興祚見在陞任卽有新撫臣初到視事恐未識閩疆情形臣之鰓鰓調督臣宜駐廈門居中節制別有調遣臣得耑統前進行間將士知有督臣後趨糧運策應則糧無匱乏之患兵有爭先之勇壯志勝於數萬甲兵今若與臣偕行征糧何以催趨封疆何所仰賴安內攘外非督臣斷難彈壓緩急臣故密疏入告使督臣聞知必以臣阻其滿腔忠藎仰冀

皇上密行溫諭督臣免其躬親偕行臣同督臣操練水陸精銳官兵充足三萬分配戰艦儘可破賊但臣僅掌有水

師提督印信未奉有征勦臺灣之

勅諭伏望迅賜頒發以副轉睫師期俾得申嚴號令用以
節制調度所有督臣題定功罪賞格賜臣循例而行則大
小將士咸皆凜遵至於師中叅酌見有同安總兵官臣吳
英智勇兼優竭忠自許可以爲臣之副尤望恩加獎勵又
有興化總兵官臣林承金門總兵官臣陳龍平陽總兵官
臣朱天貴海壇總兵官臣林賢留閩候補總兵官臣陳昌
江東副將臣詹六奇隨征左都督臣李日烺等俱堪衝風
破浪勇敢克敵其勦搗巢藉我

皇上天威丕著醜類遊魂何難殄殲航勦滅賊關係臣之
一身承當責任何等綦重以故凡賊之形勢風之順逆事

之圖畫亟當十分詳審以圖萬全況出汪洋大海之外非
敢輕舉妄動苟且從事致負眷顧之隆臣當會商將軍合
詞具題而將軍海務情形非所諳曉又恐奸細窺探洩漏
定以自將戰略師期密疏上聞

請決計進剿疏

施琅

鄭逆抗拒顏行深費

皇上宵旰南顧之憂臣茲復荷

聖恩起用非重臣以水師提督之任實用臣進平臺灣之
逆患兼面奉

天語溫諭勦滅臺灣以免生靈塗炭銜

命以來兼程疾趨卽於去歲十月初六日抵廈門視事點

驗船兵全無頭緒焉敢妄舉進剿時欲具疏入告恐傷寅恭和衷故日以繼夜廢忘寢食一面整船一面練兵兼製造器械躬親挑選整勘至今年四月終方稱船堅兵練事竣全備移請寧海將軍臣喇哈達侍郎臣吳努春到廈門看閱此時將士人人思奮臣卽於五月初五日會同督臣姚啟聖統率舟師開駕至銅山以俟夏至後南風成信聯艚進發第督臣以五月初一日准部咨進剿海賊關係重大之

旨隨轉意不前而三軍側聽並盡解體臣自初七日起可與督臣決計進取力爭十餘日至十六日將軍二臣抵銅山到臣營所臣面懇將軍轉勸督臣乘南風進剿以成捷

枯拉朽之勢奈督臣終執

肯意以督提同心合意爲辭臣故不便違抗姑聽督臣主
疏展期實非臣之本意此二將軍臣親到銅山所目擊而
共悉臣衷也本月初九日承准兵部劄付內開寧海將軍
喇哈達等疏稱總督提督稱南風不如北風臣深爲駭異
切思臣當日在銅山與將軍二臣並無言及南風不如北
風之語日與督臣爭執南風進勦不惟三軍皆悉其情卽
通省士庶亦皆共曉且督臣日遣各總兵勸臣權依督臣
之議今將軍二臣具疏竟不分晰明白陷臣推托不然若
非

皇上寬置不究則臣先後疏章自相矛盾欺誑君父罪當